

大唐六典國子監卷第二十一

唐玄宗御撰

集賢院學士兵部尚書兼中書令修國史上柱國開國公

臣李林甫等奉敕注上

國子監

祭酒一人

司業二人

丞一人

主簿一人

錄事一人

府七人

史十三人

亭長六人

掌固八人

國子博士二人

助教二人

學生三百人

典學四人

廟幹二人

掌固四人

太學博士三人

助教三人

學生五百人

典學四人

掌固六人

四門博士三人

助教三人

學生五百人

俊士八百人

典學四人

掌固六人

國子直講四人

大成十人

律學博士二人

助教一人

學生五十人

典學二人

書學博士二人

學生三十人

典學二人

算學博士二人

學生三十人

典學二人

國子監祭酒一人從三品

周禮師氏以三德三行教國子一日至德二日敏德三日孝德一日孝行

二曰友行三曰順行凡國之貴遊子弟學焉又保氏養國子以
道教之六藝謂禮樂射御書數漢官儀云漢置博士祭酒一人
秩六百石後漢以博士聰明有威重者一人為祭酒韋昭辨釋
名曰祭酒者凡燕饗必尊長老以酒祭先故曰祭酒徐廣曰古
人具饌則賓中長者舉酒祭地示有先也魏因之晉武帝立國
子學置祭酒一人晉今日祭酒博士當為訓範總統學中眾事
傅暢諸公讚云裴頠為國子祭酒奏立國子太學起講堂築門
闕刻石寫五經百官志祭酒皇朝服介憤進賢兩梁冠佩水蒼
玉官品第三東晉及宋齊並同梁置國子祭酒一人班第十三
比列曹尚書陳國子祭酒秩中二千石品第三後魏初第四品
上太和二十三年增為從第三品北齊改為國子寺祭酒一人
從三品後周闕隋初國子學祭酒隸太常從三品開皇十三年
後置國子寺仁壽元年罷國子唯置太學大業三年改為國子
監依舊置祭酒一人皇朝因之龍朔二年改為大司成咸亨中
復舊光宅元年改為成均
監祭酒神龍元年復舊

司業二人從四品下

禮記曰樂正司業父師司成秦漢已來無
聞隋大業三年置司業一人從四品皇朝

因之龍朔二年改為少司成咸
亨中復舊垂拱中增置二人

國子祭酒司業之職掌邦國儒學訓導之政令有六學焉一曰

國子二曰太學三曰四門四曰律學五曰書學六曰算學凡春

秋二分之月上丁釋奠于先聖孔宣父以先師顏回配七十二

弟子及先儒二十二賢從祀焉舊令唯祀十哲及二十二賢開元八年敕列曾參於十哲之次

并七十二子並許從祀其名歷已具於祠部祭以太牢樂用登歌軒縣六佾之舞若

與大祭祀相遇則改用中丁祭酒為初獻司業為亞獻博士為

終獻若皇太子釋奠則贊相禮儀祭酒為之亞獻皇帝視學皇

太子齒胄則執經講義焉凡釋奠之日則集諸生執經論議奏

請京文武七品以上清官並與觀焉凡教授之經以周易尚書

周禮儀禮禮記毛詩春秋左氏傳公羊傳穀梁傳各為一經孝

經論語老子學者兼習之諸教授正業周易鄭玄王弼注尚書孔安國鄭玄注三禮毛詩鄭玄注左

傳服虔杜預注公羊何休注穀梁范甯注論語鄭玄何晏注孝經老子並開元御注舊令孝經孔安國鄭玄注老子河上公注

其禮記左傳為大經毛詩周禮儀禮
為中經周易尚書公羊穀梁為小經
每歲終考其學官訓導功

業之多少而為之殿最

丞一人從六品下隋大業三年置國子丞三人從六品皇朝省置一人

主簿一人從七品下北齊國子寺置主簿員隋置一人皇朝因之

錄事一人從九品下北齊國子學有錄事員隋置一人皇朝因之

丞掌判監事凡六學生每歲有業成上于監者以其業與司業

祭酒試之明經帖經口試策經義進士帖一中經試雜文策時

務徵事其明法明書算亦各試所習業登第者白祭酒上于尚

書禮部其試法皆依考功又加以口試明經帖限通人已上明法明書皆通九已上

主簿掌印勾檢監事凡六學生有不率師教者則舉而免之其

頻三年下第九年在學及律生六年無成者亦如之假違程限及作樂雜

戲亦同唯彈
琴習射不禁

錄事掌受事發辰

國子博士二人正五品上

漢書百官表云博士秦官也掌通古今秩比六百石員多至數十人武帝

置五經博士宣帝稍增員十二人漢儀云文帝博士七十餘人

為待詔博士朝服玄端章甫冠司馬彪百官志云博士十四人

魏以太常統太學博士祭酒晉帝初置博士十九人咸寧四年

立國子學置國子博士一人晉官品第六介憤兩梁冠服佩同

祭酒宋齊無所改作梁置國子博士二人為九班陳品第四秩

千石後魏初國子博士從五品上太和二十二年增為第五品

北齊置國子寺有博士五人品第五隋初國子隸太常置博士

五人 大業三年置國子監博士一人正五品皇朝增置二人

助教二人從六品上

晉武帝初立國子學置助教十五人官品視南臺御史服同博士東晉孝武損為十

人宋齊並同梁班第二陳品第八秩六百石後魏第七品北齊

置十人品同後魏隋初置國子助教五人從七品下大業三年

減置一人皇

朝增置二人

國子博士掌教文武官三品以上及國公子孫從二品已上曾

孫之爲生者五分其經以爲之業習周禮儀禮禮記毛詩春秋
左氏傳每經各六十人餘經亦兼習之習孝經論語限一年業
成尚書春秋公羊穀梁各一年半周易毛詩周禮儀禮各二年
禮記左氏春秋各三年其生初入置束帛一篋酒一壺脩一案
號爲束脩之禮其習經有暇者命習隸書并國語說文字林三
蒼爾雅每旬前一日則試其所習業

試讀者每千言內試一帖
試講者每二千言內問義

一條總試三條通一
及全不通斟量決罰

每歲其生有能通兩經已上求出仕者則

上于監堪秀才進士者亦如之

助教掌佐博士分經以教授焉

典學掌抄錄課業

廟幹掌灑掃學廟

太學博士三人正六品上

東晉元帝增置國子博士十六人謂之太學博士品服同國子博士梁置

太學博士八人班第二陳品第八秩六百石後魏初第六品中

太和二十二年從第七品北齊國子寺有太學博士十人從第

七品後周置太學博士下大夫六人班第四隋初置太學博士

五人仁壽元年置國子唯立太學置博士五人從五品大業三

年減置二人降為從

六品皇朝增置三人

助教三人從七品上

後魏置太學助教第八品中北齊國子寺有太學助教二十人從第九品下後周置

太學助教上士六人三命隋初太學助教五人

正九品下大業三年減為一人皇朝增置三人

太學博士掌教文武官五品已上及郡縣公子孫從三品曾孫

之為生者五分其經以為之業每經各百人其束脩之禮督課

試舉如國子博士之法

助教已下並掌同國子

四門博士三人正七品上

後魏書劉芳表云太和二十年立四門博士於四門置學案禮記云天子

設四學鄭玄注周四郊之虞庠也今以其遼遠故置於四門請
移與大學同處從之後魏百官志四門博士第九品北齊置二
十人正九品上後周間隋置五人從
八品上皇朝減置三人加正七品上

助教三人從八品上

北齊國子寺有四門助教二十人隋初置四門助教五人從九品下皇朝因置三人

四門博士掌教文武官七品已上及侯伯子男子之爲生者若

庶人子爲俊士生者

禮記王制四命鄉論秀士升之司徒曰選士司徒論選士之秀者升之學曰俊士隋

書志曰舊國子學處士以貴賤梁武帝欲招來後進五館生皆取寒門俊才不拘員數數即今之後士也分經同太

學其束修之禮督課試舉同國子博士之法

助教已下掌同國子

直講四人

皇朝初置無員數長安四年始定爲四員俸祿賜會同直官例

直講掌佐博士助教

之職專以經術講授而已

大成十人

皇朝置取貢舉及第人考功簡聰明者試書日誦得一千言并口試策試所習業等十條通七然後補充

仍授散官俸祿賜會同直官例給
初置二十人開元二十年減十人

大成通四經業成上於尚書吏部試登第者加一階放選其不

第則習業如初每三年一試若九年無成則免大成從常調

律學博士一人從八品下

晉百官志廷尉官屬有律博士員晉
刑法志曰衛覬奏請置律學博士轉

相敎授東晉宋齊並同梁天監四年廷尉官屬置胄子律博士

位視員外郎第三班陳律博士秩六百石品第八後魏初律博

士第六品太和二十二年為第九品上北齊大理寺官屬有律

博士四人第九品上隋大理寺官屬有律博士八人正九品上

皇朝省置一人
移屬國學

助敎一人從九品上

皇朝
置之

律學博士掌敎文武官八品已下及庶人子之為生者以律令

為專業格式法例亦兼習之其束修之禮督課試舉如三館博

士之法

助教掌佐博士之職如三館助教之法

書學博士二人從九品下

代本蒼頡作書周禮保氏教以六藝其五日六書鄭司農云象形會意轉

注處事假借諧聲也古謂之小學漢書食貨志曰八歲入小學

學六甲五方書計之事晉衛恆字勢曰昔皇帝有沮誦蒼頡始

作書契蓋觀鳥跡以興思也秦纂古文有八體一日大篆二日

小篆三日刻符四日蟲書五日摹印六日署書七日殳書八日

隸書王莽時甄豐校文字復有六書一日古文二日奇字三日

篆書四日佐書五日繆篆六日鳥書自漢已來不見其職隋置

書學博士一人從九

品下皇朝加置二人

書學博士掌教文武官八品已下及庶人子之為生者以石經

說文字林為專業餘字書亦兼習之石經三體書限三年業成

說文二年字林一年其束脩之禮督課試舉如三館博士之法

算學博士二人從九品下

代本隸首造數周禮保氏教以六藝其六日九數即九章也一日方田二

日粟米三日差分四日少廣五日商功六日均輸七日方程八

日贏不足九日旁要漢書律厯志日數者一十百千萬所以算

數事物也小學是則職在太史羲和掌之魏晉已來多在史官
不列於國學隋置算學博士一人從九品下皇朝增置二人

算學博士掌教文武官八品已下及庶人子之為生者二分其
經以為之業習九章海島孫子五曹張邱建夏侯陽周髀十有
五人習綴術緝古十有五人其記遺三等數亦兼習之孫子五
曹共限一年業成九章海島共三年張邱建夏侯陽各一年周
髀五經算共一年綴術四年緝古一年其束脩之禮督課試舉
如三館博士之法

番禺許之璇初校

北平史悠咸覆校

唐六典卷二十一

番禺陶福祥再覆校

大唐六典少府軍器監卷第二十二

唐玄宗御撰

集賢院學士兵部尚書兼中書令修國史上柱國開國公
臣李林甫等奉敕注上

少府監

監一人

少監二人

丞四人

主簿二人

錄事二人

府二十七人

史十七人

計史三人

亭長八人

掌固六人

中尚署

令一人

丞四人

府九人

史十八人

監作四人

典事四人